



清閔閣遺稿卷六

雲林倪瓚元鎮父著

八世孫瑄梓

七言古詩

送徐君玉

閩江之水清漣漪
隔江名園多荔枝
閩中女兒天下
白越波飛槩逐鳧
鷺棹歌清綿洲渚
闊蕩槩落日令
人悲蠻烟怪雨忽
冥密蔣芽蒲葉相
參差此中勝事
不為少徐中遠遊牽我思

寄張徐二秀才

東膠山麓繚修阻春水鳴渠竹滿園玄真棲遁樂耕
釣徐孺風流存子孫適我騎犢詣其處荷尔作黍留
清言夜闌把燭竟歸卧烟草蝶飛勞夢魂

十二月七日岳季堅夜坐走筆贈之

僧扉共卧風雨夕岳生清真何太顛持家有弟足自
慰無錢沽酒殊可憐梅蕊衝寒欲破白燈花惱人故
生妍孰知旅枕作孤夢周處廟前行買船

古意一首答曹德昭

齊王好竽客鼓瑟操瑟何以干齊門古人結交多豪
傑况爾封君之子孫王國陳詩終大雅楚俗尚鬼悲
招魂相思日暮不可見鴻飛冥冥目力昏

劉君元暉八月十四日邀余玩月快雪齋中對

月理詠因賦長句

卷簾見月形神清疑是山陰夜雪明長歌欲覓剡溪
載悵然停杯遠恨生爾營茅齋名快雪邀我吹笙弄
明月明星如銀浮翳消垂露成帷桂花發酒波蕩漾
天河傾笙聲嫋嫋秋風咽古人與我不並世鶴思鷗

情迥愁絕

其二

涼月紛紛疑積雪凝暉散彩白於銀此時獨酌開軒
坐便欲剡溪尋隱淪爾營茅齋名快雪我醉行吟踏
秋月河漢無聲風露寒心境冷然同一潔

餘不溪詠併序

開玄館在餘不溪濱距溪無百步上清王真人
所居溪流冬夏盈演玉光澄映與他水特異
故為名焉庚午歲春因市藥過浙江趣便道

將歸梅里俯斯水而悅之泝流間咏盥濯平
津顧瞻壇宇近在東麓遂舍舟造其下真人
為出酒脯燕嘯巖洞竟日乃返悠悠徂歲忽
已十有七寒暑矣余既為農畝畝身依稼穡
復邇政繁奔走州里欲為昔遊其可得乎鍊
師超然物表間情夷朗周覽宇內將還玄館
余因彷彿疇昔之所覩追賦短章以餞斯別
若夫超踪溷濁逍遙玄邁蓋深志於是矣覽
而咏言能無動悲慨乎

餘不溪水綠生賞放舟演漾當青春舟隨鶴影忽行
遠洞口桃花飛接人雲松蔽虧烟蘿席儼在溪東之
石壁羽人垂衣坐鼓簧饋我晨食芝菌香從茲更發
洞庭渚濯髮咸池臨故鄉
餘不溪水涵綠賞微風吹波盛龍鱗看山蕩槳不知
遠花間白鹿來迎人溪迴路轉松風急竹林華房霞
氣濕忽逢道士頎而長疑是韓國張子房相期飄拂
紫烟裡下攬滄溟浮玉觴

醉題許生壁

生有破屋山西邨風雨不出卧衡門聚書其間讀且
溫客來輟書就琴尊寂寞古道安可論

苦雨行

孟秋苦雨稻禾死天地晦冥龍怒嗔南隣老翁卧不
起漏屋濕薪愁殺人自云今年八十剝力農一生茲
始病兩逢赤旱三遇水租稅何曾應王命吾今寧免
身為魚死當其時良可吁

寄徐元度

二月苦雨晝如晦閉戶獨眠無所為黃鳥翻飛乍依

竹櫻桃爛熳開滿枝起覓杜康欲自慰坐無徐孺令人悲春帆早晚江西去東湖宅前舟可維

醉歌行酬李徵君春日過草堂賦贈

昔聞杜陵之茅屋汀花冥冥汀樹綠舊題新咏荅年華種术行樹繞山麓石床蘚澁青泥乾決渠流水夜潺湲當年寶劍淪黃土空餘山月照波間今我不樂懷往古短世長年誰比數花下欣逢李白來山鳥溪童亦歌舞酒酣長嘯五情熱軒冕何榮築巖說夷齊抗節餓首陽道採薇飽芳潔勿歌虞夏神農詩賢

愚等是百年期少文豈愛壁間畫老疾俱來難命駕仰視翕忽浮雲馳安得乘螭與雲化揚花縈夢滿晴天迸壑春雷驚醉眠李侯神爽色不動手敲茶雪落輕烟相逢為樂誠草草竟欲與君卧烟島城郭千秋白鶴飛海上食霞不知老

送潭州魯總管

翩翩文鶴飛渡淮歲筵五采下天階西疇昨夜雨初遍田父謳歌有好懷湘潭山色隨輕輟談笑來為此州牧隔岸桃林散綺霞三月洞庭春水綠

對梓樹花

去年梓樹花開時美人明璫坐羅帷今年梓樹花如
雪美人死別已七月梓花如雪不忍看沉吟懷思淚
闌干鳴鳩乳燕共悲咽柳綿風急烟漫漫

汎滄浪

滄浪可濯纓春雨看潮生斷得木蘭槳欲向桃源行
桃花源裏秦人住花發綺霞明處處何用文章寄武
陵時有漁郎自來去

賦許君震杏林小隱

江上春雨歇喬柯散繁花開尊藉莓苔共醉仙人家
霽景麗華彩微波搖絳霞東風夜來急吹雪滿江沙
明朝杏熟虎為守郊原綠遍聞鳴蛙

贈顧定之

輕薄紛紛新少年論詩作賦如湧泉為雲為雨手翻
覆背面傾擠當面憐阿翁七十仍踰四與我同心生
並世高卧白雲食絳霞草堂門對靈巖寺

贈康素子

道德五千言玄之而又玄谷神不死曰玄牝用之不

勤以緜緜太原道士康素子口講此書手畫指猶龍
之後有蒙莊迴薄宇宙有根柢蝴蝶栩栩觀物化濠
魚洋洋樂何似壺立弟子御風遊遊仍有待曷足恃
尻輪神馬鴻濛外恍惚杳冥隨所止化人之居鄰太
清十二重樓臨五城千劫謂如一食頃不起於座空
飛行王喬鶴上吹玉笙食棗東海安期生雲車霓靴
到平地渴飲懸河天為傾大茅登雲二弟迎紫虛永
和傳玉經揚曦以授許長史王斧清映道初成貞白
子微如日炯千巖萬壑春冥冥葛玄登鍊匡廬頂淵

雷一聲眠鶴醒道陵章奏陽平治子孫繩繩祖武繼
重陽晚出金末裔全真尔名欽世世仰瞻在昔老莊
列近比肝膽遠胡越要知道不出智勇疾似秋空鷹
一撇素乎素乎尔隣乎道德而不孤凡夫皆具仙真
體一扇仁風病即蘇

江南曲

春風顛春雨急清泪泓泓江水濕落花辭枝悔何及
絲桐哀鳴亂朱碧嗟胡為客去鄉邑相如家徒四壁
立柳花入水化綠萍江波搖蕩心怔縈

陸隱者禱雪獲應

紇千山頭黃草枯年年雪花大如掌春風草綠牛羊
蕃誰為祈禳復誰賞南雪由來到地消今年冬暖知
為妖民間禱雪誠希有旱禱桑林聞昔諶

鄭有道隱居梁鴻山

伯鸞近在東山隱室無孟光唯兩兒草堂資煩王錄
事蓮社緣依遠法師迎我掃除松下雪因君起寫壁
間詩便思從子遂真隱深谷紫芝堪療饑

賦耕雲贈友

大茅峯前萬頃雲烟耕雨溉曉網縵乃知神物無根
蒂誰種空山誰與耘愛君茅屋當南面間看陰晴玩
其變白鶴眠松夜夜歸朝逐孤雲如匹練

贈季丙卿

季子蕭條千古心斷碑荒冢在江陰行人過客寧知
此春雨年年江水深君家正近延陵郭世遠義風猶
未薄誰識寥寥末裔孫種杏成林惟賣藥

延陵道

延陵道去國千有餘里民風質直昔季子攸居義興

其屬邑過百里而遠麗于南隅民當西晉有周處肆
勇聞狼於鄉閭人皆以為患父老揚言其非一朝發
憤易行忠孝俱其歿已千載民今仰而祠我幸生居
在鄰邑春服始成來游而來娛式逢劉公揚驪踟躕
酌山之泉撐渚之蒲相率奠拜步趨襜如歎咏而去
方舟載塗錫山之陽其水舒舒山氣磅礴而敷腴上
升為雲雨彌滿乎九區厥土沃若君子於以田鮒公
度中流揚揚其旗載挹載注原茲古初睠此平墟泰
伯所都夫子所謂至德也已矣吁嗟溯流百世下聞

其風者尚敦乎薄夫

送潘生適越

鏡湖春水綠沄沄兩岸楊花飛白雲落日繫舟微雨
歇一壺濁酒飯香芹嘉尔盛名年少得筆精墨妙比
羊欣日長高卧無餘事應有人書白練裙

贈陸子華

為愛泖西春水綠三年不來今乃復如來不三宿桑
下子華留我經旬宿東鄰唯有沈休文文字詩篇與
討論時時亦復具雞黍未能厭飫嘉盤飧為君吐出

無味句歎爾網魚共濡煦不作卑卑兒女情仰天大笑飄然去

宿薩判官家聽琴

薩公能琴賢且文城闈一遇承清芬高齋掃榻新雨霽為鼓瀟湘之水雲竹林蕭瑟風嫋嫋山日掩靄波泫泫曲終推琴意逾妙高山流水餘音聞

送錢成大赴淮南

桐柏山高淮水闊道途悠悠心忽忽大藩作鎮據兩淮公侯干城孰子越帶雨春潮送櫓聲淮山千里青

相迎隱居行義今寥落到邑煩君訪董生

李徵君將還揚州因言沈郎官吳中賦此以寄
二月桃始華淮南客還家堦前踈雨落堂上春衣薄
為言沈約在吳中玉壺青絲酒如空春風相過蕙草
綠芳菲滿堂樂未終

姚節婦詩

節婦復節婦處心良獨苦苟不義以生寧從義而死
荆南流水石齒齒寇辱形虧澆清泚妾可死不可辱
夫從父生死携女婦兮婦兮死所安使我感激涕洟

瀾古今出處多射利委身事國為貪奸羸王易主意
未殫身沒令名生美官嗚呼史臣直筆古來少孤臣
直節今尤艱

奉寄沈理問

紫霞虛皇之上清迢迢十二樓五城烟霧囚靡鳥為
使霞綃衣裳翠織成雲旂芝蓋集真侶清露如鉛籠
玉宇回看人世萬虵蟊擾擾泥塗困雲雨騏驥繫足
鳴何饑黃鵠截翮不得飛杜鵑哀號鷓鴣泣苦竹嶺
頭無月輝可憐仙凡一塵隔哀樂紛綸殊不極人間

亦有學仙人神巫傲傲舞瑤席精靈翕忽虹影長觴
湛桂酒羞楓香雲情蜷局難為駐世味膾脍不足嘗
仙人舊亦人間住乘雲往列仙曹署願從帝所話悲
辛明良留心乃奇遇我聞天道自循環福善殃淫帝
或關令威亦成歸來願豈遂忘情出兩間

贈丁醫士

泊舟風雨芙蓉城江上君山雲錦屏我來已是千年
後館主子孫猶姓丁丁君手煉不死藥芙蓉仙人久
相約孤鰥七十老無家種杏春來看落花

詠鶴

丹鳳歲徒何處藏翳茲天孫雲錦裳嘎然長鳴引圓
吭晨飛岷峨暮良常玉笙寥寥珮琅琅千年仙驥時
歸翔步苔飲泉下趨蹌忽然不返歲月長尔居雞羣
獨彷徨羽衣猶白未老蒼清都霄臺應已忘啄腥吞
腐塵土鄉乘軒豈復思華陽樊籠未離勿張皇

螭螭

歲己亥春仲月之六日自寅迄酉震雷且雪甲辰暮
冬日癸卯螭螭見於震陬飛龍挾雷電落景皎出月

老夫頻年熟灾異夏凄其風冬乃熱晝霧暝如夜淫
雨十旬浹疲農不使憇殘喘志士不得安巖穴國之
祆沴古亦有十月雷電天或隕石或雨血人君修德
灾可弭桑生於朝赫王業方今滔滔天下墊鋒鏑四
起羣豪傑孰能拯亂以為治嗜仁而不虐吁嗟斯民
命矣夫荼毒殘傷亦何辜

秋鶴軒

開軒北郭名秋鶴鶴影翩翩向寥廓不見千年丁令
威悲嗟城郭是耶非紛紛霜葉飄庭樹苔色荒陰翳

烟霧草迳逶迤深樹中時有山僧自來去

賦翠濤硯

岳翁嘗寶翠濤石今我還珍翠濤硯翠濤泐泐生穀
紋雲章龍文發竒變元章硯山徒自惜此硯顛應未
曾見我初避亂失神物玉蟾滴淚空悽戀珠還合浦
乃有時洗滌摩挲冰玉姿書舟輕迅逐鳧鷖喜出火
宅臨清漪松雲磨香滓毛錐天影江波映碧滋一咏
新詩開我眉

題王元用秋水軒

秋水如玉涵綠蒲玉壺美酒清若無佳人倚窓調錦
瑟文君勸飲坐當壚昔年種柳繞漢南樹今搖落人
何堪惟有年年秋水至翠烟石黛漾晴嵐開軒清映
臨秋水斜日荷花淡相倚凌波微步襪生塵交甫凝
情佩還委

送顧生歸四明

江上買舟歸四明楓林搖落秋風生好營三釜為親
養此去千里飛雲情禾稼登場候雁至霧雨如晦晨
雞鳴舒王舊日宰邑處苔石縱橫湮姓名

贈陶得和製墨

麋膠萬杵搗玄霜螺製初成龍井庄悟得廷珪張遇
法古松烟細色蒼蒼桐花烟出潘衡後依舊升龍柳
枝瘦請看陶法妙非常一點濃雲瓊楮透

郭文顯推人禍福神驗賦贈

昔者馬季主賣卜如有神郭君言禍福奇中乃其倫
顧我年衰野而慙尚復紛紛嬰世網為卜明年春水
生欲問桃源刺漁榜

題陳氏齋壁

爇爾茅齋寡塵鞅時來下帷清晝眠風流任使書裙
去嬾慢惟知坦腹便林間病鶴尚俛啄池上山雞徒
自憐何為當年種桃者移家偶脫區中緣

題曹雲西畫松石

雲西老人子曹子畫手遠師韋與李衡門晝掩春長
閒彩毫動處雄風起葉藏戈法枝如籀蒼石康康橫
玉理庭前落月滿長松影落吳松半江水

題趙千里扇上畫山

誰見解衣作盤礴卷懷雲烟歸掌握春雨冥冥江水

深竹間日暮衣裳薄零落王孫翰墨餘越王臺殿久
荒蕪要知人好畫亦好愛比當年屋上烏

題趙榮祿馬圖

嘗聞唐開元時畫馬曹將軍妙合變化神紛紜少陵
為作歌其詞藹如雲又聞宋元祐之中李龍眠畫法
奄出將軍前蘇黃二子誇神駿險語驚飛蛟蟄淵國
朝天馬來西極振鬣駑駘為辟易玉堂學士寫真龍
筆陣長驅萬人敵學士歌詩清且腴當時作者數揚
虞畫成題就兩竒絕價擬連城明月珠吁嗟天馬天

一隅寶繪於今亡已夫學士多師內廐馬得法豈在
曹李下俗工未解知神妙此日罷駑遍華夏好事流
傳亦苦心誰為幽賞伯牙琴獨悲蘭亭蠶紙隨零雨
轉覺臨寫紛紛費毫楮

為曹僉事畫溪山春曉圖因題

荆溪之水清漣漪溪上晴嵐紫翠圍連舸載書烟渚
泊提壺入林春蕨肥身遠雲霄作幽夢手栽花竹映
山扉磯頭雪影多鷗鷺也着狂夫一浣衣

畫寄王雲浦

吳松江水漾春波江上歸舟發棹歌邀我江亭醉三
日鳳笙鸞吹拂雲和紛紜省署縻官職老我澄懷倦
遊塵看君骨相自有仙故作長松掛青壁

題畫

橘窓春夜雨潺潺剪燭裁詩畫碧山迸水定侵林下
路蕙花委砌石苔斑夢乘艇子清江闊坐聽橈聲暗
相撥未必漁翁似我聞棹歌不待鳴鳩聒

畫竹贈王允剛

子猷借地種修筠何可一日無此君葉籠書席搖翠

雨陰結香爐屯綠雲聞孫住近吳江渚二仲遨遊如
蔣詡置酒邀余寫竹枝隔竹庖人夜深語

題畫竹

吾友王翁字元舉喚我濡毫畫鱣楮喬柯修竹蒼蘚
石霜葉風梢碧滋雨湖州仙去三百禩坡翁高絕孰
與侶黃華父子亦間出氣粗惜產旃裘所本朝高趙
妙一世茂視子端少稱許薊丘黃巖筆墨間瑞鶴神
鸞競翔翥二公去後無復有谷鳥林鳥誰拍數奎章
博士丹丘生未若負嶠能濡响道園歌咏譽丹丘坡

曉畫法難為語常形常理要玄解品藻固已英靈聚
少陵歌詩雄百代知畫曉書真謾與坡深書畫詩更
妙味永甘香試耽咀嗟余生後愛詩畫所恨遨遊不
從汝王翁好古已成癖說史談詩身欲羽吳江遇我
意慷慨飯我羹芹一炊黍晚持此卷索塗抹醜婦為
嚙走隣女此詩此畫君勿笑焚棄筆硯當樽俎

題畫贈呂彥貞

江上秋雨晴泊舟烟水汀孤吟誰和予悠悠蟋蟀鳴
故人邀我留三宿豆畦蘿徑居幽獨松醪陸續酌山

飄燈影縱橫寫風竹水光雲氣共悠悠鶴思鷗情樂
此留無褐無衣悲骯髒三沐三釁歎伊優君自息機
江上住我且沿洄從此去圖訖新詩草草裁眼底流
光水東注

至正十三年三月四日同章鍊師過張先生山

齋壁間見柯敬仲墨竹因懷其人其詩文書
畫鑒賞古跡皆自許為當代所少狂逸有高
海岳之風但目力稍恕耳今日乃可得耶

柯公鑒書奎章閣吟詩作畫亦不惡圖書寶玉尊鼎

解文彩珊瑚光錯落自許才名今獨步身後遺名將
誰託蕭蕭烟雨一枝寒呼爾同遊如可作

江南春

汀洲夜雨生蘆筍口出瞳矐簾幕靜驚禽蹴破杏花
烟陌上東風吹鬢影遠江搖曙劍光寒轆轤水咽青
苔井落紅飛燕觸衣巾沈香火微縈紛塵

十一月廿三日率性德原共載過林下而余適
不在遂返棹還家明日詩來因次韻重邀之
雲林風雪德不孤指顧可求塗豈迂兩忘主賓政自

好一以禮法何其拘我方飄忽念歲月君乃踈豁笑
人奴再為理棹急相就放筆看寫狂遊圖

題文貞公墓道奉先亭子

奉先亭子山之陰雲氣低迴何處尋烏啼隧道風林
靜蘚剥龜趺雨溜深故老猶言前日事鯁生謾感二
毛侵河山流峙英靈在世幻紛紛一短吟

恒德堂

虛林間居養黃寧隱几逍遙遊玉京怡然樂康息天
黥良醫良相仙道并厥施同仁而異名沒身身存故

長生龍虎佩符鳳皇翎出戲玄洲入紫清一念不已
三千齡子能神視廬幽貞觀恒斯見天地情氣專志
一德乃恒

賦清隱閣

爾營草閣名清隱著在輕鷗遠水邊春池覓句正思
爾拄杖敲門忽繫船共賞竒文哦庾信更誇草聖法
張顛到此自忘歸興逸研雲歸寫古苔篇

寫墨竹贈顧友善

顧伯末派隱君子林居江濱古東里澡身潔行讀書

史思及天下之善士綠竹猗猗蔚材美獨立不懼羣
不倚長吟揮毫為君起寫其形模惟肖似諒執直清
可以比

贈丘氏兄弟及周生

岑參兄弟皆好竒二丘那復論東西款門看竹我初
到置酒投轄烏欲棲掃壁寫圖觀落墨淪芹留坐綴
新題東風甚與周郎便桃李陰陰晝滿蹊

題柯敬仲竹

誰能寫竹復畫善高趙之後文與蘇檢韻蕭蕭人品

係篆籀渾渾書法俱全光博士生最晚耽詩愛畫同
所趨興來揮洒出新意孰謂高趙先乎吾

古劍行

雍公孫子氣甚清示我楊顛古劍行劍峯詩律兩奇
絕秋蓮光彩玉康康楊顛健筆老縱橫是亦鐵中之
錚錚吐詞鬱律鳴不平鳳皇來為盛世鳴一代惟數
虞翁生余也學書學劍既老何由而成名

富貴咏

富貴詘於人曷若貧肆志何從得此言問之魯連子

鴻飛冥冥天為低下視俛啄何卑微去去烟蘿碧巖
裏瀑流千尺洗塵衣

食無肉

食無肉兮出無車旅無依兮歸無家秋風嫋嫋江漢
槎遠波落日明荷花枳棘芟芟道云賒飛蓬蕭颯雙
鬢華夜有吟蛩晨有鳴蛙玉琴在匣但聞淫哇龍劍
掛勝幽遐吾生有涯知無涯世迫隘兮紛浮華思從
句漏求丹砂忍食安期棗如瓜高卧白雲餐絳霞

趙善長氏妙於繪事以荆關法為遜學周君畫

天香深處圖復賦此篇

周君洵美玉色溫有宋尚書之子孫尚書第宅古閩
國秋風老桂蒼雲屯有子五人總攀桂孝友才華稟
忠義周君今住讓王城澤流綿延俄八世載懷先世
發咏歌月明珠樹粲交柯白榆歷歷不可數手援北
斗酌天河尚書父及子騎箕入霄漢逝波逐回風翕
忽驚世換清芬沾灑後人多翠靄金葩影零亂鳳歌
我亦楚狂人吳市經遊幾度春泛泛去來舟不繫狎
鷗決去忽難親天香深處留茶屋為愛珍圖思超俗

好繩祖武揚德馨公侯之始尔其復

次遜學廣文舟出金焦山韻

眼前金芙蓉一朶迎人青焦山岌業蒼石稜長江無
波素練平蛟鼉出沒魚龍變化翕忽徙南溟絳霞晴
虹映朝日光彩激射雲錦屏指點齊州瞰吳楚欬唾
萬里吞為吐江水潺湲橫泪流古人去我今幾烁有
子仲謀才不世多情庾亮晚登樓溯流轉柁鳴津鼓
歷亂沙鷗起檣櫓當時行樂恣經過舉酒觀魚登網
罟海若決水不滿酌任公釣鰲且胥俎棹謳清綿斷

復續瑤草琅玕動盈掬豈意一朝憂患生夫君處南
予處北江流東去不西迴爾亦胡為乎嗟哉寒蜂長
吟送落景砌蛩悲切助予哀仙人王子喬吹笙駕風
雲招邀女媧補天手鍊石看作五色文

和周正道拔時髦韻

何處林間搭鳳毛鳳兮歲蕤潛九苞空林春風露梢
梢雉雉不聞雀鳴皋雲中金支紛翠翹龍鸞夭矯羣
仙翺網羅張弛野喧囂羣飛畢命罔遁逃隕身折翮
隨所遭毋啄我鷖傾我巢鳳兮麟兮遠莫招腥風血

毛灑林郊隼鷗飛擊當絳霄西飛鷓鴣東伯勞旭日
鳴雁聲嗷嗷鬼車鵠鷓鴣鴟鴞風雨如晦聞呶號時
乎時乎孰如嘲吁嗟清濁寧混淆拔乎其萃皆時髦

春草堂

是日袁君子英同集軒中

春草軒中隱几坐中有袁髯間似我欲浮清海狎羣
鷗擬向鳴夷借輕舸二月水煖河豚肥子苦留我我
懷歸半鎊雪浪薰香茗掃榻蕭條共掩扉麝煤蠟紙
高梁筆寶繪珎題品神逸洗滌古玉龍眠池臨榻竒
蹤淨名室紅蠶捲碧春歸酣檳榔萋葉嚼香甘夜闌

更鼓湘妃瑟笙磬同音詠雅南別君此去何草草山
為迴旋海為倒令威白鶴會重來世人胡為易衰老
至正丁酉十一月五日余友陳兄惟允過余旅
寓鼓楚詞一再行因寫墨君并走筆賦長句
以贈時漏下二刻矣筆硯荒落自愧草草惟
允當有以教我耶

陳郎鼓琴初月明能對楚人作楚聲江風動地波撼
席蘆雪撲帳雲棲薨每驚遠道意慘愴忽此聚首心
怔營賦詩寫圖以為贈比竹貞德琴亮清

寫松江山色并詩贈子俊茂才

窮冬舟過吳淞渚千里交歡少嵇呂范張一室小如
壺雞黍時時慰羈旅阿兄彈琴送飛鴻讀書頗有沉
潜功阿弟煮茶敲石火滿江春雨聽松風圖書四壁
醒愁睡隱几嗒然忘世慮扁舟一葉五湖遊身與閒
雲共來去三月六日天氣清為爾咏出詩無聲袖有
青銅錢二百為余沽酒作魚羹

題虞勝伯畫仙臺高士圖

仙臺有高士聞在最高峰濯足五湖水結巢千歲松

霞扉雲扃閔丹壑落花如雪吹微濛醉顏高卧日曛
瞳飛鳧蹴踏金芙蓉紫芝眉宇玉鍊容往來倏忽其
猶龍誰能貌此世外蹤青城山人仙臺翁運筆直與
天同功倪生作詩以詠歎凌跨倒景他日期相從

壬子九月望日過孤雲大士寶淨精舍留宿十

九日為寫林亭遠岫圖并賦

敬亭山色青如染妙德端居在西崦片雲出岫本無
心佛石縈林晴冉冉江西帆影又江南笑看羣狙芋
四三道遇化城聊暫止更營寶淨小禪龕

送友之紹興

賀監宅前路荷花今亦無空餘湖上月照見水中蒲
送爾作官幽絕處錢唐江頭飛柳絮廳署臨堤滿夕
嵐惟有沙鷗自來去

題張外史剪韭亭

外史詞華耿霜月劍花秋瑩鷗鷓膏皎然光燄照綠
水不假雕琢慚鉛刀雅音自出性情正庸工徒為血
汗勞若人逝矣不復作稂莠雨深那可薶

題畫雅宜山齋圖

靈巖對直雅宜山穹林巨石憶蒼灣若翁遁跡在其
麓有子讀書常閉關松根茯苓煮可掘林下慈烏去
復還寫圖愛此錦步障白雲紅杏春闌斑

戲贈東方生

國士腰間玉鹿盧猛將手中金僕姑英雄往往出屠
釣輕薄紛紛能諂諛寶劍生塵無所用黃流明月若
為污楊雄枉儼相如賦今日論兵重武夫

